

Esgobaeth Llandaf + Deoniaeth Caerdydd

EGLWYS DEWI SANT

www.eglwysdewisant.org.uk

CROESO i Eglwys Dewi Sant ar yr Aelwyd

24 Ionawr 2021

Ystwyll III

CYHOEDDIADAU'R SUL

GWASANAETHAU HEDDIW

Cynhelir gwasanaeth o'r Foreol Weddi yn yr Eglwys am 9.00am. Darlledir y ddau bodlediad fel arfer.

GWASANAETH YSUL NESAF YN YR EGLWYS

Y Sul nesaf gweinyddir y Cymun Bendigaid yn yr Eglwys am **6.00pm**. Cofiwch, os ydych yn bwriadu dod i'r gwasanaeth hwn a wnewch chi gysylltu â Marian Fairclough er mwyn iddi gadw sedd i chi. Anfonwch e-bost: faircloughmarian@gmail.com neu ffoniwch: 02920 2088 5151 **erbyn 4.00 o'r gloch prynhawn Sadwrn**.

NEWYDDION O'R DDEONIAETH

Cefais fy ngwahodd gan yr Esgob i ymgymryd â'r swydd o fod yn Ddeon Bro Caerdydd. Rwyf wedi derbyn y gwahoddiad a byddaf yn ymgymryd â'm cyfrifoldebau newydd ar 11 Chwefror gyda gwasanaeth trwyddedu dros Zoom am 8pm. Mae'r swydd hon yn ychwanegol at fy ngwaith fel Ficer EDS. Hoffwn i ddiolch i bawb sydd wedi anfon neges i'm llongyfarch ac am eich cefnogaeth ddi-ffael. *Y Ficer.*

DIOLCH

Dymuna Heike James ddiolch i bawb o EDS sydd wedi anfon gair o gydymdeimlad ati hi a Dafydd yn eu profedigaeth, ac i bawb oedd wedi ei gwneud hi'n bosibl i gynnal angladd Rob yn yr eglwys, yn ôl ei ddymuniad.

WYTHNOS WEDDI DROS UNDEB CRISTNOGOL

Mae'r wythnos Weddi dros Undeb Cristnogol yn gorffen heddiw yfory ar Wyl tröedigaeth St Paul. Mae'r deunydd eleni wedi cael ei baratoi gan gymuned fynachaid Grandchamp yn y Swistir. Y thema eleni yw "Aros yn fy nghariad a byddwch yn dwyn llawer o ffrwyth" ac yn seiliedig ar Ioan 15:1-17. Os hoffech ddilyn y myfyrdodau dyddiol dilynwch y ddolen isod:

<https://ctbi.org.uk/wp-content/uploads/2020/10/WPCU-2021-Welsh-English-pamphlet-Final.pdf.pagespeed.ce.nosddqcmJa.pdf>

YN YR EGLWYS:

Dydd Sul 31 Ionawr 2021

Ystwyll IV

6.00pm – Y Cymun Bendigaid

GWASANAETHAU HEDDIW: Ystwyll III

Bydd linc i bodlediad y gwasanaeth boreol yn ymddangos gyda'r e-bost fydd yn cynnwys y daflen hon. Hefyd, mae modd ymweld â gwefan yr eglwys i ddod o hyd i'n gwasanaethau ar lein.

Bydd podlediad heno am 6.00pm yn wasanaeth o'r Hwyrrol Weddi.

YN EIN GWEDDIAU

Cofiwch yn ein gweddïau y cleifion: Cathrin Brynach, Pegi Davey, Enid Davies, John Hicks, Margaret Jones, Sally Lewis, Catrin Morgan, Nia Roberts, Ceri Saunders, Dawn Parry Sawdon, Gwen Thomas, Jack Thomas (Offeiriad), ac am bawb sy'n gofalu amdanynt.

Gweddiwn hefyd dros bawb a fu farw yn nhangnefedd Crist, dros Terence Bryer, Joan Thomas a thros bawb y cofiwn am eu marwolaeth yr adeg hon o'r flwyddyn. Dyro iddynt, O Arglwydd, orffwys tragwyddol a llewyrched goleuni gwastadol arnynt.

ADDOLI AR YR AELWYD

Os oes gennych gopi o lyfr Gweddi yr Eglwys yng Nghymru ar gyfer y Foreol a'r Hwyrrol Weddi (glas tywyll 1984), mae croeso i chi ddilyn trefn y gwasanaethau ynddo a'i ddarllen i chi eich hun yn dawel neu ar lafar, neu ym mha bynnag fodd sy'n gyffyrddus i chi.

Mae'r Salm a'r darlleniadau ar gyfer y Sul fel y canlyn:

Y Foreol Weddi:

Salm: Salm 128
Genesis 14:17-20
Ioan 2:1-11

Yr Hwyrrol Weddi:

Salm 33:1-12
Jeremeia 3:21-4:2
Titus 2:1-8, 11-14

Mae croeso i chi ddilyn trefn y gwasanaeth ar y daflen hon hefyd.

Trefn gwasanaeth syml ar gyfer y gwasanaeth boreol
Thema: Gweld eisiau'r wledd briodas

Deuwch, hil syrthiedig Adda,
Daeth yr Iwbil fawr o hedd;
Galw'r ydys bawb o'r enw
I fwynhau tragwyddol wledd:
Bwrdd yn llawn, yma gawn,
O foreddydd hyd brynhawn.

Ceisiwch wisgoedd y briodas –
Gwigoedd hyfryd, hardd eu lliw;
Nid oes enw teilwng arnynt
Ond cyfiawnder pur fy Nuw:
Lliain main ydyw'r rhain
Sydd yn cuddio pob rhyw staen.
William Williams, Pantycelyn
Emynau'r Llan 155

Yn enw'r Tad, a'r Mab, a'r Ysbryd Glân. Amen.

Gras a thangnefedd a fo gyda chwi
A'th gadw di yng nghariad Crist.

Dad y gogoniant, sanctaidd a thragwyddol,
edrych arnom yn awr mewn gallu a thrugaredd.
Bydded i'th nerth orchfygu ein gwendid,
i'th lewyrch oleuo ein dallineb,
ac i'th Ysbryd ein denu at y cariad hwnnw
sy'n cael ei ddangos a'i gynnig inni gan dy Fab,
ein Gwaredwr Iesu Grist. Amen.

Arglwydd, trugarha.
Crist, trugarha.
Arglwydd, trugarha

Cyffeswn yn ostyngedig ein pechodau gerbron yr
Hollalluog Dduw.

Dad nefol,
yr ydym wedi pechu ar feddwl, gair a gweithred,
a heb wneud yr hyn a ddylem.
Mae'n wir ddrwg gennym,
ac yr ydym o ddifrif yn edifarhau.
Er mwyn dy Fab Iesu Grist a fu farw drosom,
Maddeua inni'r cwbl a aeth heibio
ac arwain ni yn ei ffordd ef
i gerdded fel plant y goleuni. Amen.

Yr Hollalluog Dduw, sy'n maddau i bawb sy'n wir
edifeiriol, a drugarhao wrthym, a'n rhyddhau o
bechod, ein cadarnhau mewn daioni a'n cadw yn y

bywyd tragwyddol; trwy Iesu Grist ein Harglwydd.
Amen.

Gogoniant yn y goruchaf i Dduw,
ac ar y ddaear tangnefedd i'r rhai sydd wrth ei fodd.
Moliannwn di, bendithiwn di,
addolwn di, gogoneddwn di,
diolchwn i ti am dy fawr ogoniant.
Arglwydd Dduw, Frenin nefol,
Dduw Dad Hollalluog.

O Arglwydd, yr Unig Fab, Iesu Grist;
O Arglwydd Dduw, Oen Duw, Fab y Tad,
sy'n dwyn ymaith bechod y byd,
trugarha wrthym;
tydi sy'n eistedd ar ddeheulaw Duw Dad,
derbyn ein gweddi.

Oherwydd ti yn unig sy'n Sanctaidd;
ti yn unig yw'r Arglwydd;
ti yn unig, O Grist, gyda'r Ysbryd Glân,
sydd Oruchaf yng ngogoniant Duw Dad. Amen.

Y Colect (Ystwyll III)

Hollalluog Dduw,
y datguddiodd dy Fab mewn arwyddion a gwyrthiau
ryfeddod dy bresenoldeb achubol,
adnewyddda dy bobl â'th ras nefol,
ac yn ein holl wendid,
cynnal ni â'th allu nerthol;
trwy Iesu Grist dy Fab ein Harglwydd,
sy'n fyw ac yn teyrnasu gyda thi,
yn undod yr Ysbryd Glân,
yn un Duw, yn awr ac am byth. **Amen.**

Darlleniad I: Datguddiad 19. 6-10

A chlywais lais fel sŵn tyrfa fawr a sŵn llawer o
ddyfroedd a sŵn taranau mawr yn dweud: "Halelwia!
Oherwydd y mae'r Arglwydd ein Duw, yr Hollalluog,
wedi dechrau teyrnasu. Llawenhawn a gorfoleddwn, a
rhown iddo'r gogoniant, oherwydd daeth dydd
priodas yr Oen, ac ymbaratodd ei briodferch ef.
Rhoddwyd iddi hi i'w wisgo liain main disglair a glân,
oherwydd gweithredoedd cyfiawn y saint yw'r lliain
main." Dywedodd yr angel wrthyf, "Ysgrifenna: 'Gwyn
eu byd y rhai sydd wedi eu gwahodd i wledd briodas
yr Oen.'" Dywedodd wrthyf hefyd, "Dyma wir eiriau
Duw." Syrthiais wrth ei draed i'w addoli, ond meddai
wrthyf, "Paid! Cydwas â thi wyf fi, ac â'th gymrodyr
sy'n glynu wrth dystiolaeth Iesu; addola Dduw.
Oherwydd tystiolaeth Iesu sy'n ysbrydoli
proffwydoliaeth."

Salm 128

Gwyn ei fyd pob un sy'n / ofni'r / Arglwydd :
ac yn / rhodio / yn ei / ffyrdd.

Cei fwyta o / ffrwyth dy / lafur :
byddi'n hapus / ac yn / wyn dy / fyd.

Bydd dy wraig yng nghanol dy dŷ fel gwin/wydd /
ffrwythlon :

a'th blant o amgylch dy / fwrdd fel / blagur •
o/lewydd.

Wele, fel hyn / y ben/dithir :
y / sawl sy'n / ofni'r / Arglwydd.

Bydded i'r Arglwydd dy fen/dithio • o / Seion :
iti gael gweld llwyddiant Je/rwsalem • holl / ddyddiau
• dy / fywyd,

Ac iti gael gweld / plant dy / blant :
Bydded / heddwch / ar – / Israel!

Darlleniad II: *Ioan 2:1-11*

Y trydydd dydd yr oedd priodas yng Nghana Galilea, ac yr oedd mam Iesu yno. Gwahoddwyd Iesu hefyd, a'i ddisgyblion, i'r briodas. Pallodd y gwin, ac meddai mam Iesu wrtho ef, "Nid oes ganddynt win." Dywedodd Iesu wrthi hi, "Wraig, beth sydd a fynni di â mi? Nid yw f'awr i wedi dod eto." Dywedodd ei fam wrth y gwas-anaethyddion, "Gwnewch beth bynnag a ddywed wrthyich." Yr oedd yno chwech o lestri carreg i ddal dŵr, wedi eu gosod ar gyfer defod glanhad yr Iddewon, a phob un yn dal ugain neu ddeg ar hugain o alwyni. Dywedodd Iesu wrthynt, "Llanwch y llestri â dŵr," a llanwasant hwy hyd yr ymyl. Yna meddai wrthynt, "Yn awr tynnwch beth allan ac ewch ag ef i llywydd y wledd." A gwnaethant felly. Profodd llywydd y wledd y dŵr, a oedd bellach yn win, heb wybod o ble'r oedd wedi dod, er bod y gwasanaethyddion a fu'n tynnu'r dŵr yn gwybod. Yna galwodd llywydd y wledd ar y priodfab ac meddai wrtho, "Bydd pawb yn rhoi'r gwin da yn gyntaf, ac yna, pan fydd pobl wedi meddwi, y gwin salach; ond yr wyt ti wedi cadw'r gwin da hyd yn awr." Gwnaeth Iesu hyn, y cyntaf o'i arwyddion, yng Nghana Galilea; amlygodd felly ei ogoniant, a chredodd ei ddisgyblion ynddo.

Y Bregeth

"Y trydydd dydd yr oedd priodas yng Nghana Galilea, ac yr oedd mam Iesu yno. Gwahoddwyd Iesu hefyd, a'i ddisgyblion, i'r briodas. *Ioan 2:1-2*

Dwi'n teimlo'n ychydig yn lletchwith yn pregethu ar y Briodas yng Nghana Galilea eleni – a hynny oherwydd fy mod yn gwybod am nifer o barau oedd ar fin priodi y llynedd sydd wedi methu â chynnal eu gwasanaethau priodas. Parau sydd wedi gohirio ac aildrefnu eu priodas fwy nag unwaith, ac ar ôl aildrefnu yr eilwaith a'r drydedd waith, wedi cymryd y

penderfyniad anodd o ganslo drachefn oherwydd cyfyngiadau Covid. Mae hyn oll wedi bod yn rhwystredig i'r parau a'u teuluoedd wrth iddynt weld misoedd o waith paratoi a threfnu ar gyfer y diwrnod mawr yn mynd yn ofer oherwydd amgylchiadau y tu hwnt i'w rheolaeth. Ni allwn ddiystyru'r gwaith ychwanegol a'r straen emosiynol sydd ynghlwm ag aildrefnu priodas. Mae rhai wrth gwrs wedi bwrw ymlaen â'u gwasanaeth priodasol yn unol â gofynion y rheoliadau ymbellhau cymdeithasol. Mae hyn wedi golygu bod llawer llai o westeion wedi bod yn bresennol yn y gwasanaeth, a'r briodas yn digwydd heb na wledd na pharti i ddilyn. Mae eraill wedi penderfynu aros yn amyneddgar, i'r diwrnod hwnnw pan ddaw pethau'n well, a bydd modd i deulu a ffrindiau ymgynnull ynghyd yn ddiogel i gyd-ddathlu a chydlawenhau gyda'r pâr ar ddechrau eu bywyd priodasol. Cofiw, yn araf deg, mae'r diwrnod hwnnw yn nesáu.

Mae'n rhyfedd, wrth ddarllen yr efengyl heddiw, mor ddieithr yw'r olygfa o'r wledd briodas ac mor estron yw darllen am ddiwyddiad cymdeithasol, lle y mae torf o bobl yn mwynhau cwmni ei gilydd, yn mwynhau y bwyd a'r gwin, nes bod y gwin ei hun yn pallu. Mae'r arwahanrwydd cymdeithasol yr ydym wedi profi a theimlo i'r byw am ychydig dros naw mis bellach, yn dechrau dweud. Dechreuwn anghofio beth yw bod yng nghwmni eraill yn mwynhau cymdeithasu hamddenol, wyneb yn wyneb, heb boeni am gadw pellter a gwisgo mwgwd. Byddai'r mwyafrif ohonom, dwi'n siŵr, yn hapus iawn bod yn rhan o wledd, heb boeni rhyw lawer petai'r gwin yn pallu neu beidio oherwydd fe fyddai'r cymdeithasu a'r cwmni yn win digonol ynddo ei hunan i lonni'r galon! Rydym yn gweld eisiau'r wledd. Rhyfedd yw meddwl am y Wledd briodas yng Nghana Galilea eleni. Ond mae ein sefyllfa bresennol yn gofyn i ni ystyried y darn cyfarwydd hwn o'r efengyl mewn ffordd wahanol. Beth sydd gan yr arwydd hwn, y wyrth hon - Iesu yn troi y dŵr yn win i ddweud wrthym ni heddiw? Beth sydd gan y wyrth hon i ddweud wrthym yng nghanol y cyfnod clo hwn a'r cyffredin wedi troi'n undonog, a ninnau yn gweld eisiau'r cymdeithasu a'r cwmni wyneb yn wyneb, a bod yn rhan gyflawn o'r wledd unwaith eto?

Felly wrth i ni ystyried y wyrth hon, fe welwn ni yn gyntaf bwysigrwydd cymdeithas a chymuned. Yr ydym i gyd, dwi'n siŵr wedi dod i werthfawrogi cymdeithas mewn ffordd newydd yn ystod y misoedd diwethaf. Roedd priodas yng nghyfnod Iesu yn achlysur i'r gymuned gyfan. Roedd teulu, ffrindiau a'r gymdogaeth gyfan yn cael gwahoddiad i'r briodas ac

i'r wledd. Roedd achlysuron megis priodasau, digwyddiadau a dathliadau eraill bywyd i gyd yn ffyrdd o gryfhau y cylymau o berthynas a pherthyn oddi mewn i'r gymdeithas a'r gymuned. Mae'r efengyl yn gwneud yn glir bod Iesu a'i ddisgyblion wedi'u gwahodd i'r dathliadau. Nid yw'r efengyl yn dweud wrthym pwy oedd yn priodi; mae'r pâr yn anhysbys i ni. Ond gan fod Mair a Iesu wedi'u gwahodd, a bod y briodas ei hun wedi digwydd yng Nghana, pentref tua phedair milltir o Nasareth, cawn yr awgrym mai perthynas i Iesu oedd yn priodi. Byddai hyn yn esbonio pam yr oedd Mair wedi dod at Iesu i ddweud wrtho am yr argyfwng bod y gwin wedi pallu, yn y gobaieth y byddai'n gwneud rhywbeth i helpu a sicrhau bod y cymdeithasu a llawenydd y wledd yn parhau.

Wrth gwrs, doedd y gwin yn pallu ddim yn ddiwedd y byd, ond byddai wedi dwyn ychydig o anfri ar y teulu oedd wedi trefnu'r wledd. Gwaith y gwsteiwyr oedd sicrhau bod darpariaeth ddigonol o fwyd a gwin i'r gwsteion i gyd; byddai diffyg yn y lluniaeth yn awgrymu diffyg paratoi neu gybydd-dra ar ran y gwsteiwyr. Byddai'r naill feirniadaeth fel y llall wedi taflu cwmwl du dros y dathliadau i bawb.

Yma, fe welwn ni Iesu yn camu i'r adwy. Fel un oedd wedi derbyn gwahoddiad i'r briodas, fe welwn ni y ffordd yr oedd Iesu yn gweld pwysigrwydd mewn bod yn rhan o'i gymdeithas. Yn fynych mae gennym ni y tueddiad i feddwl am Iesu yn encilio o gymdeithas i dreulio amser gyda'i ddisgyblion yn unig, neu i fod ar ei ben ei hunan yng nghwmni ei Dad nefol. Ond roedd Iesu hefyd yn gweld y pwysigrwydd o gymdeithasu, o gymysgu ag eraill ac i fod yn rhan o bethau. Yma yn y briodas yng Nghana, fe welwn ni Iesu, nid yn unig yn cymryd rhan yn y dathliad a'r gymdeithas lon, ond hefyd trwy ei wyrth, ei arwydd i weld y cymdeithasu a'r llawenydd yn parhau, a heb gael ei andwyo oherwydd diffyg gwin. Mae'r wyrth hon, y gyntaf o'i arwyddion, yn dangos i ni fod Iesu yno yn llawenhau gyda ni, yn cyfoethogi ein cymdeithas gyda'n gilydd. Dyma'r Iesu sydd yn derbyn pob gwahoddiad i fod yn bresennol gyda ni mewn hawddfyd ac adfyd. A chyda Iesu yn bresennol gyda ni, ni fydd gwin cyfeillgarwch a llawenydd yn pallu.

Beth felly am y wyrth ei hun – Iesu yn troi'r dŵr yn win? Ar yr un llaw fe allwn ni ddweud bod y wyrth hon yn hollol dros ben llestri. Mae'n wyrth ddiangen. Doedd bywyd neb yn y fantol. Nid yw'n angenrheidiol i gael gwin i fwynhau ac i ddathlu. Efallai y byddai ambell un wedi dihuno fore trannoeth â gwaeth cur pen oherwydd y ddarpariaeth newydd o

win. Nid yn unig y cawn ein syfrdanu gan faint y dŵr a drodd Iesu'n win, tua chant chwe deg o alwyni – mae hynny oddeutu mil o boteli gwin. Ond yn bwysicach na hynny, mae ansawdd y gwin. Nid gwin o ansawdd gweddol oedd hwn, ond gwin o ansawdd da, fel y dywed llywydd y wledd wrth iddo brofi'r gwin oedd gynt yn ddŵr, "Bydd pawb yn rhoi'r gwin da yn gyntaf, ac yna, pan fydd pobl wedi meddwi, y gwin salach; ond yr wyt ti wedi cadw'r gwin da hyn yn awr". Yn y wyrth hon fe welwn ni Iesu yn cymryd y peth mwyaf cyffredin sef dŵr, dŵr sy'n cynnal bywyd, dŵr diflas, ac yn ei droi yn win arbennig o dda a hynny er mwyn cynnal y cymdeithasu, y dathlu a'r llawenydd.

Ond mae un peth sy'n aml yn cael ei anghofio wrth ystyried y wyrth hon. Yr unig rai a oedd wedi gweld Iesu yn troi'r dŵr yn win oedd Mair, y disgyblion a'r gwasanaethyddion a fu'n tynnu'r dŵr ac yn llenwi'r llestri. Doedd gweddill y gwsteion na chwaith llywydd y wledd yn gwybod o ble daeth y gwin da hwn. Nid er mwyn tynnu sylw ato ei hunan y cyflawnodd Iesu y wyrth hon; roedd Iesu yn gweithio'n dawl bach yn y cefndir, y tu hwnt i olwg y rhan helaeth o'r gwsteion. Dyma oedd rhodd Iesu i'r wledd briodas, gwin da er mwyn llonni'r cymdeithasu, heb bris nag unrhyw amodau ynghlwm wrtho. Gwin da i bawb gael mwynhau yn ddiamod: rhodd raslon Iesu i'r wledd.

Mae'r wyrth hon yn arwydd i ni o raslonrwydd eithriadol Duw tuag atom ni - ei rodd i ni yn Iesu Grist. Yn Iesu fe gawn ni gydymaith a chwmni i'n llonni, hyd yn oed yn ystod y cyfnod hwn o ymwahaniad pan welwn ni eisiau'r wledd a'r cymdeithasu a'r cwmni wyneb yn wyneb. Mae Iesu wedi troi'r dŵr yn win – ac y mae modd i ni brofi'r gwin da hwn, wrth i ni ei wahodd ef i fod rhan o'n bywydau ni yn ein byw pob dydd. **Amen.**

Credo Nicea

**Credwn yn un Duw,
Y Tad, yr hollalluog,
gwneuthurwr nef a daear,
a phob peth gweledig ac anweledig.
Credwn yn un Arglwydd Iesu Grist,
unig Fab Duw,
a genhedlwyd gan y Tad cyn yr holl oesoedd,
Duw o Dduw, Llewyrch o Lewyrch,
gwir Dduw o wir Dduw,
wedi ei genhedlu, nid wedi ei wneuthur,
yn un hanfod â'r Tad,
a thrwyddo ef y gwnaed pob peth.
Er ein mwyn ni ac er ein hiachawdwriaeth**

disgynnodd o'r nefoedd;
trwy nerth yr Ysbryd Glân daeth yn gnawd o Fair
Forwyn,
ac fe'i gwnaed yn ddyn,
Fe'i croeshoeliwyd drosom dan Pontius Pilat.
Dioddefodd angau ac fe'i claddwyd.
Atgyfododd y trydydd dydd yn ôl yr Ysgrythurau,
ac esgynnodd i'r nef,
ac y mae'n eistedd ar ddeheulaw'r Tad.
A daw drachefn mewn gogoniant
i farnu'r byw a'r meirw:
ac ar ei deyrnas ni bydd diwedd.
Credwn yn yr Ysbryd Glân,
yr Arglwydd, rhoddwr bywyd,
sy'n deillio o'r Tad a'r Mab,
ac ynghyd â'r Tad a'r Mab
a gydaddolir ac a gydogoneddir,
ac a lefarodd trwy'r proffwydi.
Credwn yn un Eglwys lân gatholig ac apostolig.
Cydnabyddwn un bedydd er maddeuant pechodau.
A disgwyliwn am atgyfodiad y meirw,
a bywyd y byd sydd i ddyfod.
Amen.

Yr Ymbiliau

Gadewch i inni weddio ar Dduw, sydd yn caru popeth a greodd â chariad anfesuradwy.

Fel Priodasferch Crist gwna dy Eglwys bob amser yn deilwng o'i galwedigaeth. Ar ddiwedd yr Wythnos Weddi dros Undeb Cristnogol gweddiwn dros eglwysy o enwadau eraill y ddinas hon. Cynorthwya ni i brofi gwin llawenydd undeb fel trwy gyd-weithio a byw ein ffydd â phurdeb, y gallwn, gyda'n gilydd ddatguddio dy gariad a'th ras di-ben draw er mwyn i'r byd gredu. Arglwydd yn dy drugaredd.
Gwrando ein gweddi.

Tywynna mewn cariad dwyfol ar holl bobloedd y byd, gweddiwn dros arlywydd newydd Unol Daleithiau America a thros holl arweinwyr y cenhedloedd, rho iddynt dy ddoethineb i ysgwyddo eu beichiau â gallu, ac i wynebu heriau ein hoes â gwroldeb. Bydded i'r cenhedloedd glywed llais tyner dy alwad ac ymateb mewn llawenydd, fel y bydd tangnefedd yn disodlo gwrthdaro.
Arglwydd yn dy drugaredd.
Gwrando ein gweddi.

Tyrd â'th ofal hael i'n cartrefi ac i gartrefi ein gwlad. Gweddiwn yn arbennig dros bawb a effeithiwyd gan y llifogydd, a thros y gwasanaethau brys a phawb sydd yn estyn llaw o gymorth iddynt yn eu hanghenion.

Boed inni wasanaethu Crist wrth wasanaethu ein gilydd, a charu fel y mae ef yn ein caru ni.
Arglwydd yn dy drugaredd.
Gwrando ein gweddi.

Cysura ac iachâ bawb sy'n dioddef, o ran corff, meddwl neu ysbryd....; rho iddynt ddewrder a gobaith yn eu trafferthion a dyro iddynt lawenydd dy iachawdwriaeth. Gweddiwn hefyd dros ein ysbytai a thros bawb sy'n ynghlwm a chynhyrchu, dosbarthu a gweinyddu'r brechlynnau.
Arglwydd, yn dy drugaredd.
Gwrando ein gweddi.

Gwrando ni wrth inni gofio'r rhai hynny a fu farw yn ffydd Grist ac sydd wedi cymryd eu lle yn swper neithior yr Oen. Bydded i win da ein cymundeb yn y byd hwn fod yn sêl ein bywyd tragwyddol yn y byd a ddaw.
Arglwydd, yn dy drugaredd.
Gwrando ein gweddi.

Wedi'n galw i wledd ein Harglwydd, gweddiwn am inni gael bod yn deilwng o'n galwedigaeth. Amen.

O am gael ffydd i edrych
Gyda'r angylion fry,
I drefn yr iachawdwriaeth,
Dirgelwch ynddi sy:
Dwy natur mewn un person
Yn anwahanol mwy,
Mewn purdeb heb gymysgu
Yn eu perffeithrwydd hwy.

O f'enaid gwêl addasrwydd
Y person dwyfol hwn;
Dy fywyd dyro iddo,
Ac arno rho dy bwn;
Mae'n ddyn i gydymdeimlo
Â'th holl wendidau i gyd;
Mae'n Dduw i gario'r orsedd
Ar ddiabol cnaud a byd.

Y clod y nerth a'r enw ,
Y mawl y parch a'r bri,
I'r Drindod sydd mewn undod,
A'r Undod pur yn Dri;
Ei glod ehedo allan,
Ei glod anfeidrol ef,
Trwy bellter annherfynol,
Ehangder maith y nef.

1 a 2 Ann Griffiths
3 William Williams, Pantycelyn
Emynau'r Llan 309

Cymun Ysbrydol

Y mae'r Arglwydd yma.
Y mae ei Ysbryd gyda ni.

Dyrchefwch eich calonnau.
Yr ydym yn eu dyrchafu at yr Arglwydd.

Diolchwn i'r Arglwydd ein Duw.
lawn yw rhoi ein diolch a'n clod.

Y Gwir a'r bywiol Dduw,
Ffynhonnell bywyd yr holl greadigaeth,
gwnaethost ni ar dy ddelw dy hun.
Rhown ddiolch i ti bob amser ac ym mhob lle
trwy Iesu Grist ein Harglwydd.

Yn dy gariad atom,
ac yng nghyflawniad yr amser,
anfonaist dy Fab i fod yn Waredwr;
daeth y Gair yn gnawd,
bu'n byw yn ein plith a gwelsom ei ogoniant.
Dros ein pechodau ni a phechodau'r holl fyd
dioddefodd angau ar y Groes.
Atgyfodasit ef i fywyd mewn buddugoliaeth
A'i ddyrchafu mewn gogoniant.
Trwyddo ef yr wyt yn anfon dy Ysbryd Glân ar dy
Eglwys
a'n gwneud ni yn bobl i ti.

Felly, gydag angylion ac archangylion,
a holl gwmpeini'r nef
molwn dy enw gogoneddus:

**Sanctaid, sanctaid, sanctaid Arglwydd,
Duw gallu a nerth,
Nef a daear sy'n llawn o'th ogoniant.
Hosanna yn y goruchaf.**

**Bendigedig yw'r hwn sy'n dyfod yn enw'r Arglwydd.
Hosanna yn y goruchaf.**

Cofio Sefydlu Swper yr Arglwydd yn ôl St Paul

Oherwydd fe dderbyniais i oddi wrth yr Arglwydd yr
hyn hefyd a draddodais i chwi: i'r Arglwydd Iesu, y nos
y bradychwyd ef, gymryd bara; ac wedi iddo ddiolch,
fe'i torrodd, a dweud, "Hwn yw fy nghorff, sydd er
eich mwyn chwi. Gwnewch hyn er cof amdanaf." Yr un
modd hefyd fe gymerodd y cwpan, ar ôl swper, gan
ddweud, "Y cwpan hwn yw'r cyfamod newydd yn fy
ngwaed i. Gwnewch hyn, bob tro yr yfwch ef, er cof
amdanaf." Oherwydd bob tro y byddwch yn bwyta'r
bara hwn ac yn yfed y cwpan hwn, yr ydych yn
cyhoeddi marwolaeth yr Arglwydd, hyd nes y daw. I
Corthiniaid 11: 23-26

Fel y dysgodd ein Hiachawdwr ni, gweddiwn yn
hyderus:

**Ein Tad,
yr hwn wyt yn y nefoedd,
sancteiddier dy enw,
deled dy deyrnas,
gwneled dy ewyllys;
megis yn y nef, felly ar y ddaear hefyd.
Dyro i ni heddiw ein bara beunyddiol
a maddau i ni ein dyledion,
fel y maddeuwn ninnau i'n dyledwyr.
Ac nac arwain ni i brofedigaeth;
eithr gwared ni rhag drwg.**

**Canys eiddot ti yw'r deyrnas,
a'r gallu, a'r gogoniant,
yn oes oesoedd. Amen.**

Cymerwn ennyd i fyfyrion ar y Cymun Bendigaidd, ac ar
orchymyn Iesu, "Gwnewch hyn er cof amdanaf".

Gan gofio y troeon eisoes yr ydym wedi penlinio wrth
ffwrdd y Cymun, ac estyn ein dwylo i dderbyn y bara,
corff Crist; ac yfed o'r un cwpan, gwaed Crist,
gweddiwn gyda'n gilydd:

**O Wynfydedig Arglwydd,
mewn undod â'th bobl ffyddlon ledled y byd,
gerbron pob allor yn dy Eglwys lle dethlir yr
Ewcharist,
dymunwn offrymu iti fawl a diolch.
Cyflwynaf i ti fy enaid a'm corff
gan daer ewyllysio bod yn un â thi'n wastadol.
Am na allaf yn awr dy dderbyn yn y Sacrament,
tyrd yn ysbrydol i'm calon.
Gwnaf fy hun yn un â thi,
cofleidiaf di â chalon, meddwl ac enaid.
Na foed fyth i ddim dy wahanu di oddi wrthyf;
fel y gallaf fyw a marw yn dy gariad. Amen.**

Angus Die

**Oen Duw,
sy'n dwyn ymaith bechodau'r byd:
trugarha wrthym.**

**Oen Duw,
sy'n dwyn ymaith bechodau'r byd:
trugarha wrthym.**

**Oen Duw,
sy'n dwyn ymaith bechodau'r byd:
dyro inni dy dangnefedd.**

Diolchwch i'r Arglwydd, oherwydd graslon yw:
ei gariad sy'n dragywydd.

Hollalluog Dad,
dy Fab ein Gwaredwr Iesu Grist
yw goleuni'r byd:
bydded i'th bobl,
o'u goleuo â'th air a'th sacramentau,
ddisgleirio â llewyrch ei ogoniant,
er mwyn i bawb ei adnabod, ei addoli,
ac ufuddhau iddo
hyd eithafoedd y ddaear;
oherwydd y mae'n fyw ac yn teyrnasu yn awr a hyd
byth. Amen.

'R wy'n gweld o bell y dydd yn dod -
Bydd pob cyfandir is y rhod
Yn eiddo Iesu mawr;
A holl ynnysoedd maith y môr
Yn cyd-ddyrchafu mawr yr Iôr,
Dros wyneb daear lawr.

Mae teg oleuni blaen y wawr
O wlad i wlad yn dweud yn awr
Fod bore ddydd gerllaw;
Mae pen y bryniau'n llawenhau,
Wrth weld yr haul yn agosáu,
A'r nos yn cilio draw.

Watkin H Williams (Walcyn Wyn)
Emynau'r Llan 48

*Mae hawlfraint Y Llyfr Gweddi Gyffredin i'w arfer yn yr
Eglwys yng Nghymru a phob gwasanaeth sydd ynddo
yn eiddo Gwasg yr Eglwys yng Nghymru 1984. Neu Y
Cymun Bendigaidd 2004*

Roots a Chaneuon Ffydd.

*Hawlfraint Gwasg yr Eglwys yng Nghymru 1984
Testun allan o Gair yr Arglwydd 2011 – yr Eglwys yng
Nghymru Hawlfraint Cyhoeddiadau'r Eglwys yng
Nghymru 2011.
Colectau a Gweddiâu Ôl-Gymun o'r Ilyfr Y Calendr
Newydd a'r Colectau. Hawlfraint Corff Cynrychiolwyr
yr Eglwys yng Nghymru 2002
Emynau – Caneuon Ffydd, Emynau'r Llan*

GWEDDIAU'R SUL

Yn ein gweddiâu heddiw, gofynnir inni weddio
dros:

- Eglwys Bangladesh
- Deoniaeth Llandaf, y Deon Bro, y Parchedig
Ganon Jan van der Lely
Ysgol Uwchradd yr Eglwys yng Nghymru Esgob
Llandaf, y pennaeth Marc Belli, y staff a'r disgyblion

GWYLIAU A DARLLENIADAU

Dydd Llun 25 Ionawr: Tröedigaeth St Pawl

Jeremeia 1:4-10; Salm 67; Actau 9:1-12

Gweddiwn dros: Esgobaeth Akure, Eglwys Nigeria
Bywoliaeth Treganna, y Parchedig Frances Wilson
(Rheithor), y Parchedig Emma Rees-Kenny (Ficer), y
Parchedig Dr Rhys Jenkins (Offeiriad cynorthwyol), y
Parchedig Benedict Yates (Curad)

Dydd Mawrth 26 Ionawr: Timotheus a Titus, Cymdeithion Paul

Hebreaidd 10:1-10, Salm 40:1-11; Marc 3:31-35

Gweddiwn dros: Esgobaeth Alabama, yr Eglwys
Esgobol

Plwyf Caerau gyda Trelái, y Parchedig Jesse Smith
(Ficer) a y Parchedig Christopher Lee (curad)

Dydd Mercher 27 Ionawr: Ioan Chrysostom (407), Esgob a Dysgawdwr

Dydd Cofio'r Holocost

Hebreaidd 10:11-18; Salm 110:1-4; Marc 4:1-20

Gweddiwn dros: Esgobaeth Alaska, yr Eglwys Esgobol
Caplaniaid Carchardai yn yr Esgobaeth, y Parchedig
Nicholas Sandford (Caerdydd), y Parchedig Dawn Tilt
(Parc, Pen-y-bont ar Ogwr)

Dydd Iau 28 Ionawr: Thomas Acwin (1274), Dysgawdwr

Hebreaidd 10:19-25; Salm 24:1-6; Marc 4:21-25

Gweddiwn dros: Esgobaeth Alban Sant, Eglwys Leogr
Plwyf y Tyllgoed, y Parchedig Colin Sutton (Ficer)

Dydd Gwener 29 Ionawr:

Hebreaidd 10:32-39; Salm 37:1-7; Marc 4:26-34

Gweddiwn dros: Esgobaeth Albany, yr Eglwys Esgobol
Plwyf Glannau Elai, y Parchedig Ganon Jan Gould, y
Parchedig David Jones (Curad)

Dydd Sadwrn 30 Ionawr:

Hebreaidd 11:1,2, 8-19; Salm 89:19-29; Marc 4:35-41

Gweddiwn dros: Esgobaeth Algoma, Eglwys Canada
Plwyf Cadeiriol Llandaf, y Tra Pharchedig Gerwyn
Capon (Deon ac Ebrwyad), y Parchedig Ganon Dr Jan
Van de Lely (Canon Canghellor), y Parchedig Ganon
Mark Preece (Canon Pen-cantor)